

## На литии

Стихира храма.

И святого самогласны. Глас 4:

Нетленного соединения прича́стник,/ блаженне пророче бы́л еси́:/ о Бозе Спа́се моём,/ молитвою Иордан раздели́в,/ по суху прешел еси,/ и на огненной колеснице,/ яко на небеса восхищен был еси,/ сугубую благодать Елиссею оставль./ Темже молим тя,/ аще и телом восхищен был еси,/ но духом от нас не разлучайся,/ и всегда Христу молися, // спастися душам нашим.

Светозарен облак Божественный, пророче, явился еси, искапая тучу богоразумия всем верным, напаяя богато вином веселия всех, верою притичущих к Божественнейшему храму твоему. Темже молим тя Божественный пророче, и боговидче, Илие, победы на враги императору нашему даруй, и душам нашим велию милость.

Самодержцу уму плоть покорил еси, Божественный Илие пророче, усердно восхождения яко по степенем в сердца твоем полагая. Темже и неправдовавша царя обличив, гнева Божия запрещение изрек. И студныя священники яко неправедны ножом погубил еси, и всех научил еси ясно вопити: воистинну Един есть Бог, Егоже Илиа проповеда.

Слава, глас 6.

О нечестива царя повеления!/ о поста исполнена крове и беззакония!/ заповеда пост да убийство сотвори́т,/ и абие убиен бысть Навуфей Израильтянин./ Что же, пророче, к сим рекл еси;/ яко тако глаголет Господь:/ понеже без правды мужа Израильтянина убил еси,/ такожде и твоя кровь пролиена будет,/ и блудницы в крови твоей измьются./ Но молитвами, Христе, Твоего пророка и проповедника,/ такового безчеловечества избави души наша, // яко Человеколюбец.

И ныне, Богородичен:

Богородице, Ты еси лоза и́стинная,/ возрастившая нам Пло́д живота́,/ Тебе молимся, молися, Влады́чице,/ со святыми апо́стола, // поми́ловати души на́ша.

## На стиховне

стихиры, глас 8: Подобен: О преславнаго чудесе!

Илия пророк предивный,/ зарею ум просветив,/ весь бысть божественен,/ и царя нечестива/ суд неправедный зря, негодует:/ темже и судом Божиим отрече́ние посылáет на него́,/ такожде и царицу яко немилостиву и

златолюбіву,/ суду Бóжию предаде./ Но молитвами, Христе, твоего проро́ка Или́й/ спаси всех нас я́ко милосерд.

**Стих:** Моисей и Аарон во иереех Его,/ и Самуил в призывающих Имя Его.

Доколе Господи, путь нечестивых спеется, пророче рекл еси? Ты насадил еси и вкоренишася, и сотвориша плод беззакония: воистину и сами зле погибоша нечестием своим. Возопиют к Тебе и не услышиши. Вскую ми показал еси нечестие судей законопреступных?

**Стих:** Ты еси иерей вовеки, по чину Мелхиседекову.

Иже честное Твое восхождение, честный во пророцех великий Илие, празднующих твоими молитвами от бед избавляй и скорбей, и лютых находений: да всегда тебе, преславный пророче, христоименитии людие, почитаем и ублажаем.

**Слава, глас 6:**

Пророче, проповедниче Христов,/ престола величества никогдаже отступáеши,/ и коемуждо болящу присно предсто́иши:/ в Вышних служа, вселенную благославля́еши, // всю́ду прославля́ем.

**И ныне, Богородичен:**

Творец и Избавитель мой, Пречы́стая,/ Христос Господь, из твоих ложесн проше́д,/ в мя оболкийся, первая клятвы Ада́ма свободи́./ Темже Ти, Всечы́стая,/ яко Божии Матери же и Деве воисты́нну/ вопием немóлчно:/ радуйся ангельски, радуйся Влады́чице, // Предстательство и Покрове и Спасéние ду́ш наших.

**Тропарь, глас 4:**

Во плоти а́нгел,/ проро́ков основáние,/ второй предтеча пришествия Христо́ва,/ Или́я сла́вный,/ свыше пославый Елиссе́ви благодáть,/ недúги отгоняти и прокаженные очища́ти:// темже и почитающим его точит исцелéния. **Дважды.**

**Слава, и ныне, Богородице Дево:**

**Аще несть бдения, тропарь святого единожды и Богородичен, глас 4:**

Еже от века утаéнное,/ и а́нгелом несведомое та́инство,/ Тобою, Богородице, сущим на земли явй́ся Бо́г,/ в неслы́тном соединении воплоща́ем,/ и крест волею нас ра́ди воспри́йм,/ и́мже воскресив первозда́ннаго, // спасе от смерти души на́ша.